



Broj: 01-50-1-54-69/05
Sarajevo, 25. oktobra 2005.

ZAPISNIK

69. sjednice Predstavničkog doma
Parlamentarne skupštine Bosne i Hercegovine,
održane 25. oktobra 2005. godine

Sjednica je počela u 10,10 sati. Prisustvovalo je 39 poslanika.

Opravdano su odsustvovali: Mirsad Ćeman, Abdulah Nakaš, Martin Raguž, Beriz Belkić, Jozo Križanović, Ibrahim Đedović, Mirko Blagojević i Elmir Jahić.

Jednom dijelu sjednice iz Vijeća ministara BiH prisustvovali su ministri Bariša Čolak i Mirsad Kebo, zamjenik ministra odbrane Enes Bećirbašić te predsjednik Upravnog odbora Uprave za indirektno oporezivanje BiH Džoli Dikson sa saradnicima.

Iz međunarodnih organizacija sjednicu su pratili: Jelena Despot i Sanja Stanojević – OHR, Kristjan Haupt – OSCE, Colin Porter i Miroslav Tadić – EU CAFAO.

Predsjedavajući Doma Nikola Špirić u uvodnim napomenama rekao je da su poslanici dobili prečišćeni prijedlog dnevnog reda s unesenim dopunama koje su usaglašene na Proširenom kolegiju Doma.

U raspravi o prijedlogu dnevnog reda Mladen Potočnik i Zlatko Lagumdžija iznijeli su prijedloge zaključaka i zatražili da ih Dom usvoji kao radne zaključke.

Prijedlog zaključka Mladena Potočnika – **da Parlamentarna skupština BiH zatraži javnu raspravu o južnoj tački izlaza na more Koridora 5c** - nije dobio entitetsku većinu. Za je glasalo 19 (FBiH 15, RS 4), protiv tri, suzdržala su se 4 poslanika.

Predsjedavajući je konstatirao da će se naknadno provesti postupak usaglašavanja, u skladu s Poslovníkom.

Na prijedlog Zlatka Lagumdžije, Dom je usvojio sljedeće zaključak:

Predstavnički dom Parlamentarne skupštine BiH zahtijeva od Vijeća ministara BiH da za sljedeću sjednicu Doma pripremi informaciju o problemima, planovima i transferu novca za potrebe Regulatorne agencije za komunikacije i Javnog RTV servisa Bosne i Hercegovine, kao nezavisnih i profesionalnih institucija.

Zaključak je usvojen s 22 glasa za, dva protiv i dva suzdržana.

Nakon glasanja o prijedlozima, predsjedavajući Špirić konstatirao je da 69. sjednica Predstavničkog doma ima sljedeći

DNEVNI RED

1. Usvajanje zapisnika 66., 67. i 68. sjednice Predstavničkog doma;
2. Poslanička pitanja i odgovori;
3. Potvrđivanje Odluke Predsjedništva BiH o utvrđivanju kandidata za generalski položaj u Vojsci Republike Srpske;
4. Izvještaj Komisije Kolegija o nastojanju za postizanje saglasnosti o prijedlozima zaključaka poslanika Vinka Zorića i Zlatka Lagumdžije, podnesenih u postupku razmatranja Odluke o prihvatanju Sporazuma o restrukturiranju policijskih struktura u Bosni i Hercegovini,

5. Zahtjev poslanika Dušanke Majkić za razmatranje Prijedloga zakona o dopuni Zakona o putnim ispravama Bosne i Hercegovine po hitnom postupku, u skladu s članom 105. Poslovnika;
6. Zahtjev poslanika Dušanke Majkić za razmatranje Prijedloga zakona o dopuni Zakona o izvršenju Budžeta institucija BiH i međunarodnih obaveza BiH za 2005. godinu po hitnom postupku, u skladu s članom 105. Poslovnika;
7. Zahtjev poslanika Nikole Špirića za razmatranje Prijedloga zakona o izmjeni Zakona o slobodi pristupa informacijama u Bosni i Hercegovini po hitnom postupku, u skladu s članom 105. Poslovnika;
8. Zahtjev Vijeća ministara BiH za razmatranje Prijedloga zakona Bosne i Hercegovine o pomilovanju po hitnom postupku, u skladu s članom 104. Poslovnika;
9. Zahtjev Vijeća ministara BiH za razmatranje Prijedloga zakona o implementaciji Konvencije o zabrani razvoja, proizvodnje, gomilanja i upotrebe hemijskog oružja i o njegovom uništavanju po hitnom postupku, u skladu s članom 104. Poslovnika;
10. Zahtjev Vijeća ministara BiH za razmatranje Prijedloga zakona o Upravi za indirektno oporezivanje po hitnom postupku, u skladu s članom 104. Poslovnika;
11. Prijedlog zakona o postupku indirektnog oporezivanja (prvo čitanje);
12. Prijedlog zakona o postupku prinudne naplate indirektnih poreza u Bosni i Hercegovini (prvo čitanje);
13. Prijedlog zakona o carinskim prekršajima u Bosni i Hercegovini (prvo čitanje);
14. Prijedlog zakona o dopunama Izbornog zakona Bosne i Hercegovine (prvo čitanje);
15. Prijedlog zakona o reviziji institucija Bosne i Hercegovine (prvo čitanje);
16. Prijedlog zakona o izmjenama i dopunama Zakona o akcizama Bosne i Hercegovine, sa Izvještajem Komisije za finansije i budžet (predlagači: poslanici Zlatko Lagumdžija, Jozo Križanović i Selim Bešlagić);
17. Prijedlog zakona o izmjenama i dopunama Zakona o porezu na dodatu vrijednost, sa Izvještajem Komisije za finansije i budžet (predlagači: poslanici Zlatko Lagumdžija, Jozo Križanović i Selim Bešlagić);
18. Prijedlog zakona o osnovama geomatike Bosne i Hercegovine, sa Izvještajem Ustavno-pravne komisije (predlagač: poslanik Mirsad Ćeman);
19. Prijedlog zakona o praznicima Bosne i Hercegovine, sa Izvještajem Ustavno-pravne komisije (predlagači: poslanici Zlatko Lagumdžija, Jozo Križanović i Selim Bešlagić);
20. Prijedlog odluke o organizaciji Sekretarijata Parlamentarne skupštine Bosne i Hercegovine;
21. Prijedlog odluke o izmjenama i dopunama Odluke o utvrđivanju kompleksa zgrada i zemljišta za smještaj institucija BiH, o njihovom statusu, uslovima i načinu korištenja;
22. Davanje saglasnosti za ratifikaciju:
 - a) Sporazuma između Bosne i Hercegovine i Kraljevine Španije o recipročnom ukidanju viza za nosioce diplomatskih i službenih pasoša,
 - b) Sporazuma o zračnom saobraćaju između Vijeća ministara Bosne i Hercegovine i Vlade Republike Grčke,
 - c) Sporazuma o zračnom saobraćaju između Vijeća ministara Bosne i Hercegovine i Vlade Republike Bugarske,
 - d) Sporazuma između Vijeća ministara Bosne i Hercegovine i Vlade Kraljevine Norveške o readmisiji vlastitih državljana i državljana trećih zemalja,
 - e) Dopunskog ugovora o kreditu između Evropske zajednice, Bosne i Hercegovine i Centralne banke Bosne i Hercegovine,
 - f) Sporazuma o grantu zakladnog fonda (Projekat zaštite kvaliteta vode) između Bosne i Hercegovine i Međunarodne banke za obnovu i razvoj.
23. Imenovanje tri člana u Zajedničku komisiju oba doma radi postizanja sporazuma o identičnom tekstu Zakona o javnom RTV servisu Bosne i Hercegovine;
24. Izvještaj o aktivnostima Obavještajno-sigurnosne agencije Bosne i Hercegovine za period od 1.6. do 31.12.2004. godine - pov. materijal.

Ad – 1: Usvajanje zapisnika 66., 67. i 68. sjednice Predstavničkog doma

Zapisnici 66., 67. i 68. sjednice usvojeni su jednoglasno, bez primjedbi.

Ad – 2: Poslanička pitanja i odgovori

Predsjedavajući je konstatirao da su za ovu sjednicu odgovore dobili: Seada Palavrić, Adem Huskić, Jozo Križanović i Petar Kunić.

Odgovor je kratko komentirao Petar Kunić.

Postavljena su nova pitanja poslanika kako slijedi:

Selim Bešliagić:

«Da li će Predstavnički dom PSBiH raspravljati o strategiji pregovarača za ulazak u Evropsku uniju?

Danas se sve više priča o pregovaraču, a manje o strategiji i obavezama koje nas očekuju na ovom važnom zadatku. Odgovor tražim od Vijeća ministara BiH».

Milorad Živković:

«Pitanje Vijeću ministara BiH – da li je određeno sjedište Agencije za pošte (poštanski saobraćaj)? Kao što je poznato, prije 5-6 mjeseci donesen je Zakon o poštama i zaključak da će nakon mjesec dana biti određeno sjedište Agencije».

Muhamed Moranjkić:

«1. U posljednjih nekoliko dana posebno, iako je to u kontinuitetu čitavo vrijeme, sredstva informiranja, među kojima i Federalna televizija u centralnom dnevniku, kao udarnu vijest daju da ovu zemlju vodi mafija. A potom nabrajaju razne kriminalne radnje.

Pitam Predsjedništvo ove države, Vijeće ministara BiH i Kolegij – hoće li se neko prozvan oglasiti ili demantom ili potvrdom navedenog? Jer je šutnja za građane ove zemlje priznanje da je to tako, a ako je tako, onda je to katastrofa za ovu zemlju i za ovaj narod.

I drugo pitanje – još u maju mjesecu ove godine ja sam prema Kolegiju Predstavničkog doma PSBiH, po članu 130. Poslovnika, uputio interpelaciju koja se tiče osiguranja zakonske i druge pravne regulative po kojoj radi ili treba da radi Administrativna komisija Parlamentarne skupštine BiH, a prije toga da se informira i ovaj dom, pa i ja - šta to momentalno od navedenog nedostaje kako bi se hitno pokrenule aktivnosti za njihovo donošenje. A na to su me ponukali izvještaji revizije i izvještaji o radu te komisije. Kolegij je postupio po istom članu, ali po stavu (2), čime je moja interpelacija preinačena u poslaničko pitanje, koje je na red došlo, nažalost, jučer. Dakle, poslije nepunih šest mjeseci, i bilo odbačeno s obrazloženjem da se ovoj komisiji ne mogu postavljati pitanja. Ja pitam:

- Ko tumači Poslovnik Parlamentarne skupštine BiH i čije je mišljenje o ovom konkretnom slučaju mjerodavno, jer se ja, normalno, s takvim obrazloženjem Komisije ne slažem?

I drugo, ako je Administrativna komisija u pravu, tražim da se moja interpelacija oživi i da se po njoj postupi».

Sead Avdić:

«1. Ovih dana i mjeseci, a može se reći i godina, postavlja se pitanje toka privatizacije u Bosni i Hercegovini. Naime, najnoviji događaji upozoravaju Vijeće ministara BiH da treba intervenirati u smislu zaštite državnih interesa Bosne i Hercegovine. Prije svega, zaštite državne imovine.

Kako Vijeće ministara BiH misli pravno zaštititi državu imovinu koja se u bescijenje dokapitalizira u procesu privatizacije, posebno u oblasti prerade i distribucije nafte u BiH? Jedinstven ekonomski prostor, državni interes traži intervenciju države u oblasti naftnog tržišta tako da Vijeće ministara BiH kreira projekat s entitetskim vladama radi sanacije Energopetrola i

Rafinerije nafte Brod kako bi se 1,6 mlrd. KM prometa godišnje zadržalo u BiH i time ove kompanije većinski zadržale u državnom vlasništvu.

2. Šta je Vijeće ministara BiH uradilo po usvojenom izvještaju Komisije za ljudska prava o mogućoj reviziji decertificiranih policajaca u BiH? Ovaj izvještaj usvojio je Predstavnički dom PSBiH i time je postala obaveza Vijeća ministara BiH da razmotri i zauzme stav.»

Vinko Zorić:

«1.Ovih dana Vijeće ministara BiH donijelo je odluku da se iz tekuće rezerve budžeta odvoji 100.000 KM za pomoć stradalima u zemljotresu u Pakistanu. Tu odluku podržavam, ali sam kroz istu ovu formu, tj. poslaničkim pitanjem, pitao Vijeće ministara BiH – kako će i hoće li pomoći u saniranju štete koja se dogodila u zemljotresu 2004. godine u Sovićima, u općini Grude, u Bosni i Hercegovini? Ovo pitanje ranije sam postavio, ali nisam dobio odgovor niti je Vijeće ministara BiH nešto preduzelo. Stoga to isto pitanje ponavljam!!

2. Kada će institucije vlasti osigurati građanima Bosne i Hercegovine mogućnost grijanja na lož-ulje bez plaćanja akciza i poreza? Napominjem da su drugi energenti oslobođeni istih obaveza?»

3. Da li će Vijeće ministara BiH finansijski čestitati i nagraditi Boćarski savez Bosne i Hercegovine, čija je reprezentacija osvojila tri medalje – zlatnu, srebrenu i bronzanu na Svjetskom prvenstvu u Torinu, koje je održano od 26. septembra do 1. oktobra 2005.godine?

Ruža Sopta:

«Ko je određivao delegaciju koja je u Ženevi 19.5.2005. branila prvi izvještaj BiH o implementaciji Konvencije o pravu djeteta pred Komitetom UN-a o pravu djeteta?»

Ivo Lozančić:

«Moje pitanje ministru pravde – Koliko je zaključeno procesa protiv osumnjičenih za nezakonito sticanje imovine u posljednjih godinu dana? Tražim imena osoba vlasnika i vrijednost oduzete imovine.»

Zlatko Lagumdžija:

“ Šta su Vijeće ministara BiH, Uprava za indirektno oporezivanje BiH i ostale državne institucije učinili na provođenju zaključaka Parlamenta od 31.8.2005. godine o rezultatima primjene Zakona o dopunama Zakona o carinskoj tarifi BiH?”

Povodom diskusije Zlatka Lagumdžije koju je imao uz postavljeno pitanje, kratko su diskutirali Ljiljana Milićević i Momčilo Novaković.

Ad – 3: Potvrđivanje Odluke Predsjedništva BiH o utvrđivanju kandidata za generalski položaj u Vojsci Republike Srpske

Milorad Živković je u kratkoj diskusiji izrazio očekivanje da neko u ime predlagača obrazloži Prijedlog odluke.

Zamjenik ministra odbrane Enes Bećirbašić podnio je Domu obrazloženje Prijedloga odluke.

S 25 glasova za i tri suzdržana, Dom je potvrdio Odluku Predsjedništva BiH o utvrđivanju kandidata za generalski položaj u Vojsci Republike Srpske, kojom je na dužnost načelnika Generalštaba Vojske Republike Srpske predložen Dragan Vuković.

Ad – 4: Izvještaj Komisije Kolegija o nastojanju za postizanje saglasnosti o prijedlozima zaključaka poslanika Vinka Zorića i Zlatka Lagumdžije, podnesenih u postupku razmatranja Odluke o prihvatanju Sporazuma o restrukturiranju policijskih struktura u Bosni i Hercegovini

Predsjedavajući je konstatirao da su poslanici dobili Izvještaj Komisije Kolegija o usaglašavanju prijedloga zaključaka Vinka Zorića i Zlatka Lagumdžije, predloženih na 68. sjednici prilikom rasprave o

Sporazumu o restrukturiranju policijskih struktura u Bosni i Hercegovini. Rekao je da u Kolegiju nije postignuta saglasnost o predloženim zaključcima, pa je proveo glasanje u drugom krugu.

Prvi zaključak nije usvojen ni u drugom krugu, jer je iz Republike Srpske 11 poslanika glasalo protiv. Predložen je sljedeći zaključak: **«Predstavnički dom Parlamentarne skupštine BiH insistira da kantonalni MUP-ovi i Federalni MUP u daljnjem toku reforme policije dijele sudbinu s MUP-om Republike Srpske u vezi sa statusom i nadležnostima.»**

U drugom krugu glasanja o zaključku pod brojem 2, koji su zajedno predložili Vinko Zorić i Zlatko Lagumdžija, protiv je glasalo osam poslanika iz Republike Srpske, što je manje od 2/3, pa je predsjedavajući konstatirao da je ovaj zaključak usvojen. Prema tome, usvojen je sljedeći zaključak:

« Predstavnički dom Parlamentarne skupštine BiH obavezuje Vijeće ministara BiH da ovaj dom informira o toku reforme policijskih struktura svaka tri mjeseca, s akcionim planom implementacije za naredni kvartal.»

Ad – 5., 6. i 7:

Dušanka Majkić, u svojstvu predlagača, obrazložila je prijedloge zakona i zahtjeve za hitni postupak.

Dom nije usvojio zahtjeve predlagača iz ovih tačaka za hitni postupak, po članu 105. Poslovnika, pa će se u redovnoj proceduri razmatrati:

- Prijedlog zakona o dopuni Zakona o putnim ispravama (predlagač: poslanik Dušanka Majkić),
- Prijedlog zakona o dopuni Zakona o izvršenju Budžeta institucija BiH i međunarodnih obaveza BiH za 2005. godinu (predlagač: poslanik Dušanka Majkić) i
- Prijedlog zakona o izmjeni Zakona o slobodi pristupa informacijama u Bosni i Hercegovini po hitnom postupku (predlagač: poslanik Nikola Špirić).

Ad – 8., 9. i 10.

Dom je usvojio zahtjeve Vijeća ministara BiH da se po članu 104. Poslovnika razmatraju:

- Prijedlog zakona Bosne i Hercegovine o pomilovanju,
- Prijedlog zakona o implementaciji Konvencije o zabrani razvoja, proizvodnje, gomilanja i upotrebe hemijskog oružja i o njegovom uništavanju i
- Prijedlog zakona o Upravi za indirektno oporezivanje.

Ad – 11: Prijedlog zakona o postupku indirektnog oporezivanja (prvo čitanje)

U raspravi povodom Prijedloga zakona o postupku indirektnog oporezivanja učestvovali su Tihomir Gligorić i Šefik Džaferović.

S 27 glasova za, jednim protiv i dva suzdržana, usvojen je Prijedlog zakona u prvom čitanju.

Dom nije bio spreman odmah preći u raspravu i u drugom čitanju, pa je predsjedavajući pozvao klubove da se pokušaju usaglasiti o podnesenim amandmanima kako bi Prijedlog zakona bio usvojen na narednoj sjednici Doma.

Ad – 12: Prijedlog zakona o postupku prinudne naplate indirektnih poreza u Bosni i Hercegovini (prvo čitanje)

O ovoj tački nije bilo rasprave, pa je Prijedlog zakona usvojen u prvom čitanju. Za su glasala 23, protiv jedan, suzdržao se jedan poslanik.

Predsjedavajući je sugerirao poslaničkim klubovima da se pokušaju usaglasiti i o amandmanima na Prijedlog ovog zakona, podnesenim u plenarnoj fazi.

Ad – 13: Prijedlog zakona o carinskim prekršajima u Bosni i Hercegovini (prvo čitanje)

Nije bilo rasprave o ovoj tački dnevnog reda.

Prijedlog zakona usvojen je u prvom čitanju s 27 glasova za, jednim protiv i dva suzdržana.

Usvojen je i prijedlog predsjedavajućeg da se pređe u drugo čitanje.

Ni u drugom čitanju nije bilo rasprave, pa je Dom usvojio Zakon o carinskim prekršajima. Za Zakon su glasala 24 poslanika, dva su glasala protiv, jedan se suzdržao.

Ad – 14: Prijedlog zakona o dopunama Izbornog zakona Bosne i Hercegovine (prvo čitanje)

Nije bilo rasprave ni o ovoj tački dnevnog reda.

Dom je jednoglasno usvojio Prijedlog zakona u prvom čitanju, a zatim je usvojen i prijedlog da se odmah razmatra i u drugom čitanju.

S 29 glasova za i jednim suzdržanim usvojen je Zakon o dopunama Izbornog zakona Bosne i Hercegovine.

Ad – 15: Prijedlog zakona o reviziji institucija Bosne i Hercegovine (prvo čitanje)

Poslije uvodnih napomena predsjedavajućeg, o ovoj tački vođena je duža rasprava u kojoj su učestvovali: Dušanka Majkić, Ruža Sopta, Hazim Felić, Milorad Živković, Petar Kunić, Tihomir Gligorić, Momčilo Novaković, Ljiljana Milićević, Nikola Špirić, Seada Palavrić, Vinko Zorić, Šefik Džaferović i Miloš Jovanović.

Milorad Živković predložio je da se nadležnoj komisiji da novi rok od 10 dana da sačini novi izvještaj i da se onda na istoj sjednici Prijedlog zakona razmatra i u prvom i u drugom čitanju. Ovaj prijedlog podržao je i Vinko Zorić.

Predsjedavajući Doma dao je prijedlog zaključka na glasanje.

S 16 glasova za, sedam protiv i pet suzdržanih (Federacija 10, Republika Srpska 6), usvojen je zaključak kojim je Komisiji za finansije i budžet određen novi rok od 10 dana za podnošenje novog izvještaja, s mogućnošću podnošenja novih amandmana na Prijedlog zakona.

Ad – 16: Prijedlog zakona o izmjenama i dopunama Zakona o akcizama Bosne i Hercegovine, sa

Izvještajem Komisije za finansije i budžet (predlagači: poslanici Zlatko Lagumdžija, Jozo Križanović i Selim Bešliagić)

Predsjedavajući je u uvodnim napomenama rekao da nadležna komisija nije podržala principe Prijedloga zakona, pa je podsjetio na proceduru u slučaju kada je izvještaj komisije negativan.

U raspravi su učestvovali: Ljiljana Milićević, Dušanka Majkić, Miloš Jovanović, Zlatko Lagumdžija, Nikola Špirić, Seada Palavrić, Sead Avdić, Nijaz Duraković, Momčilo Novaković, Tihomir Gligorić, Filip Andrić, Mladen Potočnik, Vinko Zorić, Ruža Sopta i Selim Bešliagić. U ime Uprave za indirektno oporezivanje BiH govorio je predsjednik Upravnog odbora Džoli Dikson.

Zlatko Lagumdžija u raspravi je predložio da Dom, ukoliko se ne usvoji Izvještaj Komisije, usvoji zaljučak, da se Prijedlog zakona vraća Komisiji, sa novim rokom za amandmansku fazu do sjednice nadležne komisije, te da se pozove Upravni odbor Uprave za indirektno oporezivanje i Vijeće ministara da se uključe u izradu ovog zakona.

Filip Andrić se složio s prijedlogom zaključka koji je iznio Zlatko Lagumdžija, s tim što je on predložio da Dom formira radnu grupu koja će raditi na izradi zakona, a Vijeće ministara i Upravu za indirektno oporezivanje pozvati da u svemu Radnoj grupi pomognu kako bi zajedno došli do kvalitetnih rješenja.

Poslije rasprave, predsjedavajući je na glasanje dao Izvještaj Komisije.

Za je glasalo 17, protiv 13, suzdržala su se dva poslanika. Po entitetima, iz Federacije BiH za je glasalo osam, iz Republike Srpske devet poslanika.

Poslije kraće rasprave o usaglašavanju u Komisiji Kolegija, predsjedavajući je konstatirao da nema uslova da se na ovoj sjednici provede usaglašavanje i drugi krug glasanja, pa će se taj postupak obaviti naknadno.

Ad – 17: Prijedlog zakona o izmjenama i dopunama Zakona o porezu na dodatu vrijednost, sa Izvještajem Komisije za finansije i budžet (predlagači: poslanici Zlatko Lagumdžija, Jozo Križanović i Selim Bešlagić)

Predsjedavajući je podsjetio da je i o ovom zakonskom prijedlogu negativan Izvještaj Komisije za finansije i budžet i da Dom treba raspravljati i odlučivati o Izvještaju.

U ime predlagača govorio je Zlatko Lagumdžija.

U raspravi su učestvovali: Nikola Špirić, Nijaz Duraković, Milorad Živković, Momčilo Novaković, Zlatko Lagumdžija, Tihomir Gligorić, Muhamed Moranjkić, Sead Avdić, Seada Palavrić, Ljiljana Milićević, Mladen Potočnik i Selim Bešlagić.

Poslije rasprave, provedeno je glasanje o Izvještaju Komisije.

Za je glasalo 17, protiv 13, suzdržala su se tri poslanika. Po entitetima, iz Fedeacije BiH za je glasalo 11, a iz Republike Srpske šest poslanika.

Predsjedavajući je konstatirao da je Izvještaj Komisije za finansije i budžet usvojen i da je time pao Prijedlog zakona o izmjenama i dopunama Zakona o porezu na dodatu vrijednost.

Na prijedlog Zlatka Lagumdžije, Dom je, u okviru ove tačke, usvojio sljedeće

Z A K L J U Č K E

1. Zadužuje se Uprava za indirektno oporezivanje BiH da odmah pristupi ažuriranju i izradi softverskih i sistemskih ICT rješenja, te prateće dokumentacije koja će omogućiti brzo uvođenje diferencirane stope, ako zakonodavac to bude zahtijevao.

2. Zadužuje se Vijeće ministara BiH da, najkasnije do februara 2006. godine, informira Parlamentarne skupštinu BiH o toku i rezultatima uvođenja PDV-a, te efektima i realizaciji socijalnih programa, sa cjelovitim planom aktivnosti do kraja prvog polugodišta 2006. godine, uključujući i ocjenu potrebe mijenjanja poreskih stopa.

Ad - 18: Prijedlog zakona o osnovama geomatike Bosne i Hercegovine, sa Izvještajem Ustavno- pravne komisije (predlagač: poslanik Mirsad Ćeman)

Predsjedavajući Nikola Špirić napomenuo je da je Izvještaj Ustavno-pravne komisije, kao nadležne za razmatranje ovog zakonskog prijedloga, negativan i da se odlučuje o Izvještaju.

Nije bilo rasprave, pa se Dom odmah izjasnio o Izvještaju.

Za je glasalo 17, protiv 14, suzdržao se jedan poslanik. Po entitetima, iz Federacije BiH za je glasalo šest, iz Republike Srpske 11 poslanika.

Predsjedavajući je konstatirao da nema entitetske većine i da će se provesti postupak usaglašavanja.

Ad – 19: Prijedlog zakona o praznicima Bosne i Hercegovine, sa Izvještajem Ustavno-pravne komisije (predlagači: poslanici Zlatko Lagumdžija, Jozo Križanović i Selim Bešlagić)

U uvodnim napomenama predsjedavajući Špirić podsjetio je da je Ustavno-pravna komisija 8. juna 2005. dostavila Izvještaj o Prijedlogu zakona, kada nije podržala principe, a da Dom na 59. sjednici, održanoj 29. juna, nije usvojio Izvještaj Komisije, pa je Ustavno-pravna komisija ponovo razmatrala Prijedlog zakona i dostavila novi izvještaj, koji je također negativan. Naglasio je da se, kao i u prethodnoj tački, razmatra Izvještaj i o njemu odlučuje.

Momčilo Novaković rekao je da postoji razlika između ovog i prethodnog zakona, jer je Dom već jednom razmatrao Izvještaj Ustavno-pravne komisije koji je bio negativan. S obzirom da je i sada Izvještaj Komisije negativan, pitao je dokle se tako može raspravljati.

Selim Bešliagić predložio je da se o Izvještaju glasa i naglasio da bi bilo dobro da se Zakon o praznicima donese.

U raspravi su još učestvovali: Šefik Džaferović, Nikola Špirić, Milorad Živković, Momčilo Novaković i Petar Kunić. Sekretar Doma Branka Todorović, objašnjavajući odredbe Poslovnika, kazala je da nema ograničenja kada je u pitanju rasprava i odlučivanje o negativnom izvještaju komisije.

Izvještaj Ustavno-pravne komisije nije usvojen. "Za" je glasalo 13, protiv 17, "uzdržan" jedan poslanik. Iz Federacije BiH "za" su glasala dva, iz Republike Srpske 11 poslanika.

Prema tome, o Prijedlog zakona o praznicima ponovo će raspravljati nadležna komisija i Domu dostaviti novi izvještaj.

Ad – 20: Prijedlog odluke o organizaciji Sekretarijata Parlamentarne skupštine BiH

Hazim Felić prigovorio je da u Amandmanu 8. u Izvještaju Komisije ima tehnička greška, jer u tački 2.b) tog amandmana stoji «izabrani» umjesto «imenovani» zvaničnik.

U raspravi su učestvovali: Momčilo Novaković, Nikola Špirić, Hazim Felić, Petar Kunić i Adem Huskić.

Poslije kraće rasprave odlučeno je da se izjašnjavanje o Prijedlogu odluke odgodi za narednu sjednicu, a da se Administrativna komisija izjasni o grešci na koju je u raspravi ukazano.

Ad – 21: Prijedlog odluke o izmjenama i dopunama Odluke o utvrđivanju kompleksa zgrada i zemljišta za smještaj institucija BiH, o njihovom statusu, uslovima i načinu korištenja

O ovoj tački nije bilo rasprave.

Dom je jednoglasno usvojio Odluku o izmjenama i dopunama Odluke o utvrđivanju kompleksa zgrada i zemljišta za smještaj institucija BiH, o njihovom statusu, uslovima i načinu korištenja.

Ad – 22: Davanje saglasnosti za ratifikaciju:

- a) Sporazuma između Bosne i Hercegovine i Kraljevine Španije o recipročnom ukidanju viza za nosioce diplomatskih i službenih pasoša,
- b) Sporazuma o zračnom saobraćaju između Vijeća ministara Bosne i Hercegovine i Vlade Republike Grčke,
- c) Sporazuma o zračnom saobraćaju između Vijeća ministara Bosne i Hercegovine i Vlade Republike Bugarske,
- d) Sporazuma između Vijeća ministara Bosne i Hercegovine i Vlade Kraljevine Norveške o readmisiji vlastitih državljana i državljana trećih zemalja,
- e) Dopunskog ugovora o kreditu između Evropske zajednice, Bosne i Hercegovine i Centralne banke Bosne i Hercegovine,
- f) Sporazuma o grantu zakladnog fonda (Projekat zaštite kvaliteta vode) između Bosne i Hercegovine i Međunarodne banke za obnovu i razvoj.

Bez rasprave, Dom je dao saglasnost za ratifikaciju akata iz ove tačke.

Ad – 23: Imenovanje tri člana u Zajedničku komisiju oba doma radi postizanja sporazuma o identičnom tekstu Zakona o javnom RTV servisu Bosne i Hercegovine

U Zajedničku komisiju za usaglašavanje identičnog teksta Zakona o Javnom RTV servisu BiH iz Predstavničkog doma imenovani su: Izet Hadžić, Vinko Zorić i Nenad Mišić.

Ad – 24: Izvještaj o aktivnostima Obavještajno-sigurnosne agencije Bosne i Hercegovine za period od 1.6. do 31.12.2004. godine - pov. materijal

Zlatko Lagumdžija prigovorio je što sjednici ne prisustvuje niko iz Vijeća ministara BiH kad se raspravlja o ovom izvještaju. Također je prigovorio što je na Izvještaj stavljena oznaka «povjerljivo» i naglasio da ne želi učestvovati u raspravi o Izvještaju u odsustvu javnosti.

Milorad Živković također je izrazio sumnju u potrebu razmatranja Izvještaja bez prisustva javnosti, dodajući da se često zloupotrebljavaju neki termini koji se određuju zbog određenih okolnosti. Predložio je da se od Vijeća ministara BiH zatraži izjašnjavaње o tome da li je Izvještaj povjerljiv ili ne.

Predsjedavajući Špirić rekao je da je materijal Parlamentarnoj skupštini BiH dostavljen kao povjerljiv i da je obaveza Parlamentarne skupštine BiH da s njim postupa u skladu s odredbama Poslovnika koje propisuju način postupanja u slučaju povjerljivosti. Naglasio je da samo podnosilac materijala može skinuti oznaku povjerljivosti.

Sekretar Doma Branka Todorović objasnila je odredbe koje reguliraju način postupanja s povjerljivim materijalima. Također je kazala da samo podnosilac materijala može skinuti oznaku povjerljivosti.

Na kraju, predsjedavajući je konstatirao da se razmatranje Izvještaja odgađa za narednu sjednicu zbog odsustva podnosioca Izvještaja, a da će se na narednoj sjednici zatražiti izjašnjavaње predsjedavajućeg Vijeća ministara BiH o stepenu povjerljivosti Izvještaja o aktivnostima Obavještajno-sigurnosne agencije Bosne i Hercegovine za period od 1.6. do 31.12.2004. godine.

Ovim je, u 16,45 sati, završena 69. sjednica Predstavničkog doma.
Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Nikola Špirić